

DOMENIE XVII «VIE PAL AN»

Antifone di jentrade Sal 67,6-7.36

Chest al è Diu te sô sante cjase.

Diu al torne a menâ a cjase chei che si jerin pierdûts,
al è lui che i dà al popul fuarce e vigorie.

Colete

Diu, protetôr di chei che in te a sperin
e che cence di te nol è nuie di valit e di sant,
moltipliche sore di nô il to boncûr
par che, tignûts sù e guidâts di te,
o imparin a doprâ lis robis che a passin
in mût di restâ plui tacâts a di chês che a durin par simpri.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Re 3,5.7-12

Tu âs domandât par te di rivâ a capî.

Dal prin libri dai Rês

In chei dîs a Gabaon il Signôr i comparì in sium a Salomon vie pe gnot. Diu al disè: «Domande ce che o ài di dâti». E Salomon al disè: «Signôr gno Diu, tu âs metût re il to famei impen di gno pari David e jo o soi masse zovin e no sai ancjemò fâ di sorestant. Il to famei al è framieç dal popul che tu âs sielt, un stragjo di int, tante che no si rive ni a contâle ni a savê trope che e je. Dai al to famei un cûr plen di sintiment par rezi il to popul, par disserni jenfri il ben e il mâl, parcè che cui podaressial rezi il to popul che al è tant grant?». I plasè al Signôr che Salomon al ves fate cheste domande e Diu i disè: «Za che tu âs domandât chest, che no tu âs domandât par te ni vite lungje, ni ricjece, ni la muart dai tiei nemîs, ma che tu âs domandât par te di rivâ a disserni cun sintiment ce che al è just, ve che ti fâs ce che tu âs dit: ti doi un cûr che al sepi capî e judicâ come che no lu à vût nissun prime di te e nissun no lu varà daûr di te».

Peraule di Diu.

SALM RESPONSORIÂL dal Salm 118

R. La tô leç, Signôr, e je la mê gjonde.

Mi soi dit: il destin che mi tocje
al è di tignî cont des peraulis dal Signôr.

E je un ben par me la leç de tô bocje,
plui che no miârs di tocs di arint e di aur. **R.**

Che al vegni a dâmi confuart il to boncûr,
seont ce che tu i âs imprometût al to famei.
Che al rivi chi di me il to boncûr par che o vedi vite,
parcè che la tô leç e je la mê contentece. **R.**

Par chel jo i ten ai tiei ordins
plui che no al aur, al aur plui fin che al sedi.
Par chel jo o stimi juscj ducj i tiei comants,
cu la cuâl che no pues nulî nissun troi di bausie. **R.**

A son un spettacul i tiei ordins;
par chel la mê anime ju met in vore.
E dà lûs la rivelazion des tôs peraulis;

ur dà sintiment ai sempliçs. **R.**

SECONDE LETURE Rm 8,28-30

Nus à predestinâts a jessi compagns dal stamp di so Fi.

De letare di san Pauli apuestul ai Romans

Fradis, o savîn che, par chei che i vuelin ben a Diu, dut al jude a lâ a finîle in ben, par chei che a son stâts clamâts seont il plan di Diu. Parcè che chei che za prime al veve cognossût, ju à ancje predestinâts a jessi compagns dal stamp di so Fi, par che al fos il fi primarûl framieç di tancj fradis. Chei po che al à predestinâts, ju à ancje clamâts; chei che al à clamâts, ju à ancje justificâts; chei che al à justificâts, ju à ancje glorificâts.

Peraule di Diu.

CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari,

Signôr dal cîl e de tiere,

parcè che ai piçui tu âs palesât

i misteris dal ream dai cîi.

R. Aleluia.

VANZELI Mt 13,44-52

Al vent dut ce che al à e al comprechel cjamp.

Dal vanzeli seont Matieu

In chê volte, Jesù al disè a la fole: «Il ream dai cîi al è compagn di un tesaur platât tal cjamp. Un om lu cjate e lu torne a platâ; po si 'nt va dut content, al vent dut ce che al à e al comprechel cjamp.

Ancjemò: il ream dai cîi al è compagn di un marcjadant che al va a cirî perlis di chês plui bielis.

Intivât tune perle di grant valôr, al va, al vent dut ce che al à e le compre.

Ancjemò: il ream dai cîi al è compagn di une rêt butade tal mâr, che e à cjàpât sù ogni sorte di pes.

Cuant che e je incolme, i pescjadôrs le tirin su la rive e, sentâts, a metin di bande i pes bogns intes cestis e a butin vie chei scarts. Cussì al sucedarà a la fin dal mont: a vignaran i agnui e a dividaran i triscj dai bogns e ju sgnacaran te fornâs infogade. Li al sarà dut un vaî e un crustâ di dincj.

Vêso capît dut?». I rispuindin: «Sì». Lui ur disè: «Par chest ogni scriturist istruît tal ream dai cîi al è compagn di un pari di famee che al rive a tirâ fûr dal so tesaur robis gnovis e antighis».

Peraule dal Signôr.

Su lis ufiertis

Acete, Signôr, i regâi

che ti presentin pe tô gjenerositât

par che chescj misteris sants, cu la virtût de tô gracie,

a santifichin i dîs di cheste nestre vite

e nus menin a la gjonde eterne.

Par Crist nestri Signôr.

Antifone a la comunion Sal 102,2

Benedis, anime mê, il Signôr,

e no sta lassâ in dismentie nissun dai siei plasês.

O ben: Mt 5,7-8

Furtunâts chei che a àn misericordie, parcè che a cjataran misericordie.

Furtunâts i monts di cûr, parcè che a viodaran Diu.

Daspò de comunion

O vin gjoldût, Signôr, il sacrament dal cîl,
memorie eterne de passion di to Fi;
fâs, par plasê, che al zovi pe nestre salvece
chest regâl che nus à dât tal so boncûr cence fin.
Lui che al vîf e al regne tai secui dai secui.